

浙江文叢

范欽集

〔下冊〕

浙江出版聯合集團
浙江古籍出版社

浙江文叢

范欽集

〔下冊〕

〔明〕范欽著 袁慧點校

浙江出版聯合集團
浙江古籍出版社

天一閣集卷之十四

初春同客過湖閣

瑤島中盤蜃氣孤，明樓四望渺春湖。林鶯見雪歌猶澁，砌草迎風困欲蘇。下榻祇應延賦客，著書翻笑學潛夫。催花有術君知否，解珮明朝付酒胡。

題李賓甫蕭皋別業

山人蹤跡混漁樵，卜築丹丘路不遙。風掣江聲流石榻，樹分雲影過溪橋。草《玄》著在寧投閣，玩世名高且避朝。共信此生無別慕，小山桂樹不須招。

贈黃茂才還吳

把臂江門意氣雄，別顏何日更相逢？炎天驛路鳴榔外，細雨河橋對酒中。千里驂騑來逸步，九秋鷹隼厲高空。不堪林壑追隨夢，吹落金閨此夜風。

程德孺移居寶雲禪房

蚤聞息駕在珠林，選勝還能此地臨。一徑香風行處繞，諸天法雨坐來深。經翻貝葉初周諦，坐擁蓮花不染心。笑我塵緣猶未遣，皈依何日寄幽襟。

贈傅侍御慎所

捐珮何當下紫宸，淒涼滄海一綸巾。直披肝膽酬明主，肯帶鬚眉作婦人？萬里浮雲開黯淡，一時鳴鳳見風神。從來予奪皆恩造，《騷》怨能無陋楚臣？

杪秋集十洲閣用臣字

秋高湖上倚嶙峋，把臂重呼漉酒巾。東望海天寒色盡，北來沙塞鴈聲頻。幾從芳草思公子，詎是黃花對逐臣？世路驅馳應自解，莫將心賞混風塵。

送陳定海入計二首

西風吹客上皇州，旌旄翩翩萬里遊。海甸月明鴻正下，薊門霜重潦初收。劍歌不作荆高技，藻賦還同揚馬流。凋瘵未蘇征稅亟，好將尺疏達宸旒。

高城車騎競紛紛，遠道無因縮使君。勤政幾人高卓茂，傳家早自識陳群。馬蹄夜出盧溝月，龍氣晴披漢闕雲。聖主咨詢周岳牧，卑栖寧復滯江濱。

寄題梅參戎紫霞山房

子真神爽本星精，卜築名山歲幾更。遙夜靈光迴北極，曉天佳氣接蓬瀛。餐來妙得逡巡術，興在難禁汗漫行。回首赤城何處所，徒令劉阮寄空名。

春興

忽漫逢春却愛春，總多物色暢心神。堂開巢燕仍依主，歲久池魚不避人。綺陌風花行處滿，畫橋煙水望中新。祇須羊仲時經過，濁酒高歌不厭頻。

仲德游梁楚失意來歸悵然有作

江郭煙霜冬日微，何來詞客款荆扉？黃塵載道餘寒色，白眼看人只故衣。郢邸和歌神已倦，梁園買賦事全非。入門謾作尋常語，猶恐深關不下機。

懷黎舍人瑤石

侍從翩翩漢代如，早年應詔上公車。憐才自合卑梁孝，作賦誰當擅《子虛》？草就上方仍給札，藜分太乙幾紬書。何堪芳草連天遠，長日江門嘆索居。

寄王龍溪同年

書問經年隔兩鄉，邇來蹤跡定何方？越王臺上暮雲白，賀監祠前春日蒼。芳草幾迴思遠道，啼鵲無處不斜陽。懸知道術榛蕪甚，正議何人獨擅場？

行經司馬書院

湖上山樓暎遠空，別來愁恨若無窮。眼看獨鳥棲寒日，心逐疎花散曉風。萬事已隨人去後，一尊猶惜月明中。不須過客重相問，寂莫江流日夜東。

送楊參軍義問之汀州

武夷佳氣日氤氲，搖曳雙旌出海雲。名裔久推楊太尉，拜官新領漢參軍。張油坐嘯餘成畫，倚馬揮毫半檄文。爲問向來諸父老，可誰談笑淨（妖）（妖）氛？

至日稱賀

泰階遙曙紫微開，葭管飛灰淑氣回。丹鳳闕臨三殿迴，蒼龍馭轉七星來。霞觴競上南山祝，雲瑞重書太史臺。國典祇今虔大祀，受釐端復在蓬萊。

壽同年少傅呂期齋公

早乘紫氣下天關，僊骨崢嶸眇世間。調鼎黃扉時望重，垂綸滄海宦情閒。中流砥柱猶堪倚，天路冥鴻未易攀。已喜星暉聯北極，即看環召起東山。

秋日郡中游李葉諸君燕集和袁（憲僉）（僉憲）邦正四首

湖上秋光湛碧空，相將遊賞荷群公。清尊掩映江山出，高閣虛無日月通。聽樂幾人臨洞野，褰帷自古羨雄風。何當應禱天澄霽，滿地三農卜歲豐。

瑶臺突兀水中央，來往扁舟自不妨。楓葉滿庭秋瑟瑟，波流蕩日晚蒼蒼。雲霄氣色人千古，湖海襟期酒一觴。黃菊紫萸還有興，也知來月是重陽。

丘林叢桂頗堪攀，勝日招邀大小山。坐傍草堂窺竄窳，行穿花徑弄潺湲。沙邊白鳥窺人過，海上閒雲送客還。試問星輝聯越野，何如紫氣起函關？

南天遙掛赤城霞，東下蓬玄路不賒。最喜五花停寶馬，恰逢八月引僊槎。避風鴻鴈深投渚，出水芙蓉爛放花。誰意凌雲賦成後，綵毫今又屬君家。

王伯穀偕諸彥夜集

英英節俠起當年，邂逅江門氣若僊。白馬羣談傾稷下，朱絃古調出盧前。月明不待期三五，酒興何辭醉十千？草奏曉來勤太史，德星遙聚海東偏。

送百穀

竭來把臂即言旋，客思交情各渺然。不分丹楓隨地滿，獨餘白雪照人妍。濤迴海甸千峯隔，天落吳門匹練懸。他夜有懷能不減，莫令孤負剡溪舡。

哭弟禹卿四首

杳渺英靈歸未歸，憑棺涕淚不堪揮。傷心路已重泉隔，握手言何百事非。問疾時云。應節
荆花愁自媚，背風江鴈傍誰飛？側身天地成今古，獨對寒城晝掩扉。

睥睨連雲綠滿溪，舊廬近在郭門西。眠同月下移花影，笑對風前數鳥啼。勝事總隨流水去，愁心無奈亂雲低。塘春碧草年年發，猶恐孤蹤夢裏迷。

蚤時髮燥共夷猶，轉眼流華七十秋。悵我浮名空白首，輸君高卧只滄洲。成蹊到處看桃李，俾俗從人喚馬牛。此態于今那可見，淒涼巷陌罷歌謳。

親闈背養兄先逝，躑躅心情共苦辛。正擬衾裯深歲月，詎知形影隔參辰？定巢社燕空尋主，墮地棠花不復春。幾處招魂招未得，冥冥天壤劇風塵。

答朱鎮山年丈

霜老寒城競授衣，尺書何意問林扉。黃（梁）〔梁〕客夢年來見，白首交情海內稀。江渚月明賓鴈下，楚門天迴斷雲飛。何因縮地青原上，共結茅堂了道機。

包庸之碧岑樓感賦二首

凌虛高閣俯江阿，江上桃花今幾何？古渡風清喧燕雀，晴天波暖浴黿鼉。西山爽氣終朝挹，滄海潮聲入夜多。此事淒涼那可問，夕陽回首一悲歌。

天風吹客上層欄，華髮蕭蕭照鵷冠。海舶到來秋水落，塞鴻飛盡暮天寒。幾家煙火城頭出，百粵山川鏡裏看。誰信子牟猶戀闕，每憑此地望長安。

送柴季東長憲關中二首

天上啣書五鳳皇，又傳西陝借馮唐。垂鞭曉度函關月，撫劍晴飛瀚海霜。共舉漢章疏犴獄，誰憑周策靖龍荒？漫遊當日重回首，百二山河正渺茫。

聲華早歲起春曹，塵海馳驅已二毛。法象下臨當雍野，僊旌西去陟煙霄。三秦霈澤連青海，二華煙花人綵毫。試問埋輪當日地，幾人今似五陵豪？

遊余同麓太史舒園二首

海門何處訪蓬萊？滿地青山取次裁。竹隱步兵留客墅，天橫梁統選文臺。側身危蹬千峯落，極目澄湖一鏡開。莫道勝遊須作賦，卑疎不是大夫才。

海內雄風共屬君，書藏石室早時聞。幾家漁釣隣丹壑，一榻溪山寄白雲。玩世名高中散態，閉門草就《太玄》文。矢謨不負垂衣望，可戀空林鹿豕群？

湖上遣興

莽莽坤輿此十洲，謁來心賞寄清遊。煙霏倒映千門色，天漢遙通一水流。疑有名妃貽解珮，好同詞客賦登樓。青鞋白髮長無恙，不道人間萬戶侯。

己卯六月三日張纓泉袁池南張石里結社於月湖草堂四首

海上懸車積有年，每觀物色思迍然。論心且就青門客，對酒初開白社筵。風送棹歌來別浦，雲浮杯影落中天。相將不覺歸來晚，窈窕城頭片月懸。

炎天散髮坐清湖，並是高陽舊酒徒。不道此中千象緯，更從何地問蓬壺？棹歌夾岸時來往，山氣當門乍有無。入手清尊隨意盡，杖頭早已掛青蚨。

春到江門草樹薰，又看天際吐奇雲。披襟喜得林園趣，接席慙非鸞鶴群。袁紹獨高河朔興，張陽爭擅侍中文。五湖煙水予家物，一棹真堪此日分。

一丘懸結大湖中，六月涼生八面風。天上不須雲母障，坐間却有水晶宮。沙鷗片片浮當席，海樹濛濛遠映空。如此過逢不盡興，何言身世出樊籠？

七月一日纓泉紫薇莊燕集二首

名莊縹緲國門西，高會芳辰得重攜。夾院薇花催送酒，近人竹色待留題。從他節候飄桐葉，還我心情駐馬蹄。塵務不撓風物爽，沉冥猶自葆天倪。

放舟何地納新涼，名勝由來西郭堂。龍起霧雲餘澗壑，風飄荷芰上衣裳。正堪榻影浮寒水，何事蟬聲送夕陽？回騎漫教容易去，舉頭煙樹鬱蒼蒼。

題自鋤園二首

暘谷山人發興嘉，園開半畝作生涯。不知玄圃三珠樹，何似青門五色瓜？雨拾鴟羹供壽母，時分雲子與鄰家。咲予膂力年來減，嬾向東籬學種花。

南山爽氣時當牖，曲澗平泉細遶城。不藉園丁輪畚鍤，偶過野老話陰晴。帶經常日能周誦，秉耒何年一問耕？食力從來高士抱，漢陰濟北共知名。

酬王鳳洲中丞

交臂論文上國秋，別來夢想滿滄洲。遠書繾綣高懷見，往事侵尋短髮愁。肯向乾坤論瓠落，直驚詞賦擅風流。平原舊約依然在，安得乘槎十日留？

再次紫薇莊韻二首

炎郊不惜畫舡西，知是蘭亭舊侶攜。酒壓青州千日醉，調高白雪幾人題。雲過臺落松梧影，歲久階深鹿豕蹄。僊訣未須求海上，等閒靜裏識端倪。

一日金風薦早涼，溪園爽氣結華堂。呼童旋解葳蕤鑰，對客同披薜荔裳。漫擬詞章傾鄴下，最憐花樹似河陽。回思五十年來事，眼底交游盡老蒼。

暮春賓甫仲德集山池分得翁字

草閣微茫一徑通，石橋雲影亘長虹。千門花蹴中宵雨，獨樹鶯歌滿院風。新火不禁三月暮，故人又喜一尊同。綸竿直掛扶桑上，與爾相期作釣翁。

重陽日集池南宅二首

天空木落九秋期，笑結萸囊一舉卮。何處白衣能送酒，遶籬芳菊待題詩。月殘江閣鳴砧急，霜壓關河到鴈遲。漫向風前論往事，端居一飯是恩私。

登高無地攬星槎，結束西堂領物華。園下早霜收橘柚，波涵秋水淨蒹葭。餐英久自推元亮，落帽何人學孟嘉。深夜出門君興盡，解醒明日定誰家？

送李澄城有序

李子時中，家封丘，由郡知事轉簿澄城。余嘉靖甲寅，左轄陝西，戊午復補河南，感今懷舊，爰賦斯篇。

煌煌二陝域中開，使節交加問俗來。勝事已隨流水去，壯懷可向美人裁？天低太華標僊掌，路繞黃河出漢臺。曠典祇今歸異擢，知君簿領濟時才。

答張兌池兌亭兄弟詩畫牡丹寄自杞上二首

敢論時態薄黃金，不少瑤華重見臨。白雪千秋高逸調，濁河九折見雄心。從誰結束夷門俠，還我高居《梁甫吟》。太室峯頭他夜月，可能流影對披襟？

江門罷霧起憑欄，目極中原有二難。入手驪珠沙海眩，向人龍劍斗牛寒。雲飄羽客空中下，畫爲天僊。春借花神雪裏看。不信憂天仍杞俗，萬年王氣擁長安。

答汝震詩寄

作客霜華好上頭，爲懽猶自滯中州。梁王臺畔煙花簇，煬帝河邊雪注浮。白眼定遭庸豎罵，黃金肯博少年遊。何來高調飛揚甚，巴客于今欲罷謳。

壽華西洲

高居林壑謝明時，五馬流風尚可師。驚座篇章推擊鉢，名家書法會臨池。日高平野驅黃犢，雨過名山斲紫芝。入眼親交能有幾，需君笑晤百年期。

余地師棠還豐城因訊朱鎮山司空

豐城劍氣肅陰陰，有客西歸思不禁。
袖束青囊司闔闕，山餘紅葉罷登臨。
霜風一棹空江路，海月千峯後夜心。
太傅東山眠可穩？蒼生憔悴忽如今。

由溪隱赴寶嚴寺

桃溪風日暢新晴，一路看山入化城。
峯插海門低樹影，雪消澗壑走春聲。
諸天花落空床靜，滿袖香飄古篆輕。
無那賞心猶未極，夕陽歸鳥促飛旌。

秋日集十洲閣泛湖次池南韻二首

仙侶相將孤島中，恰逢秋色上簾櫳。
城開樹影千峯出，天落湖波一鏡空。
洗爵故當龍女窟，乘槎疑觸廣寒宮。
清談細酌何辭晚，華月應開此夜濛。

天青湖白總堪披，不藉冰輪一舉卮。
戶外笙歌三島路，水邊魚鳥隔年思。
香生庭桂花齊發，煖入江雲鴈獨知。
莫訝幽襟持不得，滿林風露夜闌滋。

贈李鎮峯郡博

秋老霜清菊滿庭，耽玄長日坐沉冥。黃金不博相如賦，絳帳惟傳馬氏經。閣上青藜分太乙，斗間紫氣避文星。由來世運占吾道，可向清朝嘆獨醒？

贈戴子謙

飛詔徵賢歲不虛，早從潘岳賦《閒居》。尊開白社時呼客，亭對清湖只著書。鷄肋時名堪獨咲，鴻冥天路定誰如？方舟東下皆僂島，待爾他年共結廬。

答皇甫百泉司勳

兩鄉阻絕悵離襟，杪歲驚傳海上音。自信臣心懸白日，誰知衆口鑠黃金？獄成梁吏書堪上，賦擬湘纍怨豈深？解道聲華俱是幻，詎妨時態有升沉？

酬張王屋

豪賢自昔起雲間，張季才情未易攀。賦擬《三都》高入室，書成兼兩欲藏山。借名游俠門常滿，得意尊鱸夢亦閒。幾夜扁舟攜興往，剡溪猶作雪中還。

送中齋陳郡丞入覲二首

清時佐郡亦龔黃，歌徹驪駒興轉長。即有鸚書馳闕下，久聞花色擅河陽。天橫平野星隨馬，雪罷新豐夜舉觴。對客未應論國禁，太平天子坐垂裳。

九天宮闕曉齊開，萬國冠裳結轡來。述職自循周代典，賜金誰擅漢廷才？花明上苑淹回騎，露借金莖作壽杯。從此廟謨勤攬結，和歌重向柏梁裁。

周山人公瑕游次武林使問因答

來往吳閭幾泊舡，攀嵇遙憶賞心年。風生稷下談天口，露積文園賣賦錢。傲世行藏餘白眼，向人懷抱半朱絃。洛迦東下無多路，會待觀濤興灑然。

贈濟寰楊大尹入覲四首

五雲繚繞抗雙旌，祖帳聯翩壯北行。薊野斗懸天北極，河關霜老鴈南征。歌風沛上思王畧，吊古平原却酒兵。想到國門占太史，郎星遙接紫微明。

天王北闕懸衡日，僊令東方奏計年。步擁金閭稱繫籍，班聯玉筍候鳴鞭。鈞天樂奏宮懸麗，合殿香披御篆偏。咨牧祗今修《舜典》，好將民隱一敷宣。